

四庫全書

集部

欽定四庫全書

集部

蘇門集卷二

詳校官給事中臣王鍾健

中書<sub>臣</sub>劉源溥覆勘

總校官進士臣楊懋珩

校對官原任典簿<sub>臣</sub>郭祚熾

謄錄監生<sub>臣</sub>查浩

欽定四庫全書

集部六

蘇門集

別集類五明

提要

臣等謹案蘇門集八卷明高叔嗣撰叔嗣字子業號蘇門山人祥符人嘉靖癸未進士授工部營繕司主事歷官湖廣按察使叔嗣少受知於李夢陽弱冠登朝薛蕙一見歎服晚年自訂其詩文曰蘇門集陳東序而行之當

正德嘉靖間夢陽以詩學倡導海內學者無  
不從風披靡叔嗣獨以清和婉約為宗密咏  
恬吟自標新穎雖未嘗顯與夢陽樹幟而舉  
所為折洗吞剝之病不啻一舉空之李開先  
謂何李雖似大家去唐却遠蘇門雖云小就  
去唐却近王世美亦謂李何尚有廢興徐高  
必無絕響是當北地盛行之日而深識之士  
俱已信其必傳迄今繹誦遺篇其冲澹清腴

實有不可名言之妙王世貞藝苑卮言評叔  
嗣詩如高山鼓琴沈思忽往木葉盡脫石氣  
自青說者以為善於形容馬之駿又舉羊孚  
所云資清以化乘氣以霏遇象能鮮即潔成  
輝四語為其詩贊人亦許為篤論蓋當時作  
者如林而論風雅之正聲要當以叔嗣為稱  
首固非沿流逐波者所得而比擬也乾隆四  
十三年三月恭校上

總纂官臣紀昀 臣陸錫熊 臣孫士毅

總校官 臣陸費墀

蘇門集原序

嘉靖甲午冬東在史館時蘇門高子業由晉陽入朝京師會都亭下明年東罷史職出僉湖湘憲事又明年丁酉子業由晉陽轉湖湘為觀察使從游省署中累兩月而東棄去行湖北子業乃病病十餘日死矣嗟哉悲夫子業蓋嘗謂東曰余生平所嚮慕兩人後渠崔子謂余文不如詩崆峒李子謂予書不如詩詩乃不如文矣寓內知交非子誰定吾言悲夫已矣子業既死之三月東

乃收其遺言而敘之文有知者勿論論其詩序曰夫詩以微言通諷諭其教溫柔敦厚為主本不通於微不底於溫厚不可以言詩由三百篇迄於唐其指一也國朝以經義科諸生詩道闕焉洪武初沿襲元體頗存纖詞時則高楊為之冠成化以來海內蘇豫楷紳之聲喜為流易時則李謝為之宗及乎弘治文教大起學士輩出力振古風盡削凡調一變而為杜詩則有李何為之倡嘉靖改元後生英秀稍稍厭棄更為初唐之體家相凌



競斌斌盛矣夫意製各殊好賞互異亦其勢也然而作  
非神解傳同耳食得失之致亦畧可言何則子美有振  
古之才故雜陳漢晉之詞而出入正變初唐襲隋梁之  
後是以風神初振而縟靡未刊今無其才而習其變則  
其聲粗厲而畔規不得其神而舉其詞則其聲啾緩而  
無當彼我異觀豈不更相笑也蘇門高先生子紫夙稟  
降嵩之精早契藏山之旨性隣其庶學匪待興束髮就  
傳受知北郡李生弱冠登朝亳州薛考功一見歎服五

言示志遂忘形焉良其弘麗之益異乎求聞通解之妙  
曾無先覺矣既雅見推重益自貴珍謝絕品流因心師  
古涉周秦之委源酌二京之精秘會晉餘潤契唐本宗  
每有屬綴佇興而就寧復罷閤不為淺易之談故其篇  
什往往直舉習情刮抉浮華存之隱冥獨妙閒曠合於  
風騷有應物之冲澹兼曲江之沉雅體孟王之清適具  
岑高之悲壯詞質而腴興近而遠洋洋乎斯可謂之詩  
也其言滿萬其年三十有七悲夫先生雅性亢潔不喜

凡庸雖跡在周行而情懷在野故其在讀書園諸作特  
超玄乘雖屢仕通顯非其素衷是以即事賦懷每有憂  
生之歎夫志士惜日達生玩世古今人情諒同斯揆矣  
詩凡三百一十首文五十一首共為八卷成一家之言  
刻之山堂傳諸其人明州陳東序



欽定四庫全書

蘇門集卷一

明 高叔嗣 撰

考功稿

自叙曰嘉靖三年余繇工部營繕主事調補吏部稽勲已而再調考功時三原今光祿卿馬伯循為郎中鈞州今江西按察使張子魚為員外郎武城今國子祭酒王純甫同為主事海內方

更化學士大夫相與講文藝之事翕然甚著而  
三先生皆當時號大儒余日聞所未知翰墨間  
作其後各以官遷替去而余出為山西叅政蓋  
一紀于今余于是取往日所為詩讀之凡所作  
裁如旦夕間爾精神愜怳因以太息何則余少  
竊不自度思建功業垂不朽之譽今已稍陵遲  
上睹日月之易邁下悼齒髮之將衰感古之豪  
士能自樹名堅莫踰金石矣豐碑曩鼎一旦化

為砂礫載績史冊後至有未嘗見其書者名豈  
足言邪且夫同室之人銜杯酒笑語猶不能相  
信而欲竢百世之後邪年壯氣盛回思頗自笑  
此身譬如落葉隨風東西因時榮枯草木何擇  
焉方其吐英擢秀流詫譜牒與賢士何異何所  
加損哉固知亦不足數矣時方徙居冀寧道初  
秋朔稍亡事因次其語載之篇首觀者知余懷  
所繇起云蘇門山人高叔嗣題

省中春夕

纖月升庭樹柔風動四榮坐窺宿鳥至微悅觸幽情南  
國流鶯滿西郊春草生歸歟假羽翼長路起遐征

冬至日

迎氣發陽管窮躔歷衆星我行歲一晏千里隔趨庭圭  
測愁中永雲物望外停簪裳實滯跡夢寐何由寧

御溝魚

陰陽陶融萬物一軌惟其所在有生有死故賦



云爾

鯨沼滄溟派龍池禁籞流錦鱗何澆灑素水日沉浮地  
接皇仁渥天容品庶優風雲終有氣綸餌始無憂江使  
聞遭宋波臣或泣周詎知沕穆理得坎故悠悠

明月引

滿地金波迴中天玉鏡飛有烏多夜語無鴈不春歸影  
徹銀河水光翻織女機何當御尊酒常此奉澄暉

秋夜直省中

鵲繞瞻堦樹雞栖入省臺  
蒙煙仙署合懸月瑣闌開伏  
枕南天遠聽笳北地哀  
潘生應髮變秋興賦序司馬倍腸迴  
為木同先伐積薪異後來  
無言秋夜永旦自徘徊

冬夜寄友人

客地殊不樂褰裳夕望通  
葭灰欲變節挂魄幾乘空  
楚奏今維切商歌古亦窮  
兔園推上客狗監數文雄  
留滯無萱草扳援有桂叢  
何因辭世網去矣作冥鴻

送陳秉中之吳

燕薊子分袂吳門千里遊風期夙不殞雨散使人愁目  
送青山斷心馳滄海流音容如可假夢寐一相求

至日懷大梁諸友

浮食變寒暑鳴玉供朝趨量力恨短弱更歲塞王途陽  
候浮天紀陰風出地隅感時頻自惜盈抱無新娛澄醪  
屢泛卮高齋坐自持佳晨拘省署何似并游時素雪交  
北下青陽客南移往歡徒駐目祇足攪歸思引領托長  
謠情興何蕭條同懷在萬里勞望阻今朝萱有憂難解

挂無隱易招願為皎皎駒共食故場苗

魏安福文瑞傷其師地官左君然俾為是詩

共擬丘明作誰云大雅亡時惟憂鵬集物以忌蘭芳垂  
泣驚相弔興言耿不忘鳳毛空挺異雞舌但餘香恨積  
涇流咽愁深省樹蒼招魂會有述一為訴巫陽

再調考功作二首

弱冠發大梁慷慨多奇志師事鳴臯子擔簦竊自異幾  
窮柱下策頗識壁中字雖非國士才通人嘗予器始辱

狗監知終奉龍門  
執弛負歸中朝持戟備末位  
孤根難為容名過易生累  
一官歲再移彌取簡書忌  
眷然懷夙昔回首日增愧

引疾三上書微願不克諧  
徙官復在茲心迹一何乖  
軒裳日待旦閭闔凌雲排  
入屬金馬籍出與羣龍偕  
積賤詎有基履榮誠無階  
但惜平生節逾久浸沉埋  
既妨來者途誰明去矣懷  
鳥迷思故林水落存舊涯  
惟當尋素業歸卧守荆柴

歲暮作

旦夕茲歲改蕭條旅思多雲物媚晴宇氣候屬妍和崢嶸新陽至故景實蹉跎感時豈不懷二紀倏焉過栖身慚擇木望道歎伐柯如匏吾自繫匪玉孰為磨有髮日就長心短獨若何但云畢夙志唯力豈知他

贈西原二首

昔予潛夷門同聲慕俊豪耳習長者風心馳毫丘勞共家大河側一水連波濤壯齡竊邦譽拔足叅時髦吾子

遂見知微才受虛褒傾蓋歟自值倒履趨相遭忘年當  
異代終日託同遨同遨詎幾時時變忽我撓詩人咏啜  
泣賢者憚鋪糟送子今出居流言尚莫逃撫膺空踟躕  
念別心鬱陶芝焚良有歎膏在那無熬惜乏靈均辭為  
君綴離騷

平生好篇章抗迹匹古人上望建安風退沂開元津夙  
心空十載長懷莫予親家本握剖劂文思效經綸恭承  
時嘉會中朝邁俊民興文方栖鳳著書準獲麟置足述

作塲發藻何彬彬心賞始一遇神交邁千春將登昔無  
岸言卜今有鄰分離忽迫茲辛苦何能陳晤對不可期  
咄嗟動我神本抱中孚爻俄傷明夷辰子其崇爾德攄  
光垂不泯

江翁輓章

太息懷高士常聞卜隱年一丘伴麋鹿三葉珥貂蟬遂  
啓專門業還資肯構賢藏舟稱太遽流恨向遺編

龜情



涼風吹庭樹蕭然已暮秋歲運空云往客行胡久留良  
時每易失微志果難求餘光儻可積但恐成山丘

臘日

壁昏時告遷懸象馳北陸朔風起庭隅白雪塗我屋客  
遊豈不久鑽燧頻改木祗役兼秋冬餘力不遑戮辰策  
幾犯星宵瞑疲案牘自顧鉛刀質安能久持祿先民有  
逸行抽簪入空谷我懷中園游曷云反初服

生日

年往望空除時來循虛至明兩無留畧吹萬有逸氣我  
行淹一周茲辰適再值束髮歲更七算齒紀將二少懷  
滄洲心壯損青霞志淮禽終異化魏瓠始同棄五游存  
予歡三費亡吾忌達生庶不疚乘流隨所寄

數詩壽顧中舍太夫人

一鳥自丹丘翩翩何陸離二儀含景氣金母來西池三  
角挾上元飄颻等宴娛四牡翼雙虬後車載雲旗五芝  
結福地下采永相貽六樂列仙倡玄鶴整其儀七盤舞

湘君廣庭自委蛇八珍羞水玉瘡我忽忘饑九醞安足  
重沅漚方泛卮十洲尚延佇黃髮謝修期

代贈李使君兵備齊郡

執象流玄化包虎息金革還憂十二郡選屬備疆場獨  
資樽俎士折衝展奇畫陽文辨赤土陰符訪黃石坐控  
負海險時蒐孟諸澤功成象泰岱洪烈歸竹帛光命祇  
令辰申贈繞朝策

酬家兄秋日讀書平臺見憶之作

予在長安初授衣平臺誰共偃郊扉青天寺裏客應到  
李白祠前藥欲稀旅舍再驚鴻鴈至離心常伴鶴鴒飛  
亦知相望相思苦欲學仙人縮地歸

出自薊北門行

北望何蒼蒼黃雲亘塞長匈奴寇漢壘鳴鏑遮甘涼龍  
堆坐已沒狼烟行相望將軍被嚴命倉卒備封疆出師  
憂太白募士之中黃努力一再陣沫血不相當還思關  
輔險頃歲何流亡內地困蜚輓中人無蓋藏填壑力易

屈土崩患難量欲陳九折術惜非醫國良

初侍御巡鹽山西

漢家事邊財已屈始置鹽官佐邊實征權盡籠山海利  
均輸未免公卿失肉食寧知藿食憂富國不暇富民謀  
朝廷經費貴取足文學當年寧見收古來猗氏稱國寶  
舟車輻輳河東道頗聞大賈巧乾沒轉見疲人色枯槁  
繡衣持斧出西鄰却望關山驚敵塵匡時不必資鹽筴  
為訪魚鹽遞迹人

古詩二首

荆和當路泣良璞為誰明  
茫然大楚國白日失兼城  
燕石十襲重魚目一笑輕  
古來共感歎今予益吞聲

黃河決孟門捧土安可補  
君子被微言擢髮不能數  
衆毀積鑠金羣言脩成虎  
吁嗟復吁嗟有懷予莫吐

病起偶題

空齋晨起坐懽遊罷不適  
微雨東方來陰靄條終夕  
久卧不知春茫然怨行役  
故園芳草色惆悵今如積

謁海上人相

京邑驅匹馬日有塵沙顏清晨整巾幘時叩高僧關白  
日照仙閣晴雲滿空山相看偶一笑念此客身閒富貴  
不可求余將從此還

元日時有御製詩

端冕趨三殿垂衣值七春帝歌時睹舜天樂曉聞鈞迂  
謬疲郎署遭逢謝俊民欲將草玄老猶愧子雲身

初去都夜

泛舟當日落解佩及春歸病比相如是情方叔夜非煖  
雲蒸海氣殘月吐洲暉今夕孤懷客誰云伴少微

延津縣立春

征路日纔幾客心時已煩春風花鳥處回首憶田園

安陽道雪中呈崔後渠先生

開歲物始和首路風猶急淅瀝冒晨雪陰藹窺春日驅  
車臨故疆遊子情非一伊昔本丘樊養此頑鈍質但願  
得豐年耕稼事已畢又戀聖明朝不敢安私室撫身媿



前賢卷懷良無術非公存明德吾志當誰述

漳河上元日寄呈後渠

落日銅臺北獨行南望頻鄴城今夜月燈火可憐春

行至車騎關河南界盡處與親知別

山河未可盡行處與春長驛路沙俱白關門柳欲黃親知還自反離別各相望且緩征車發中心戀故鄉

登真定大悲閣

關山千餘里平分南與北臨路兩悠悠客子情何極青

山地北橫白日天南落欲緩故園思聊憑最高閣

途中遇樊少南便別行至安肅縣作

驅馬一相見悠悠難再逢客心春夜月官舍白溝鐘不  
免微名累其如多病慵空臨南北路愧此平生蹤

安肅縣樓作

恬曠少有志牽拘茲無成已自宦王朝誰能離官程殉  
祿歸京邑抱病滯山城憂來上高樓農人正春耕感念  
故園居蕭散中田行新泉滿深池芳草夾路生日夕為

誰歎所愧當年情吾生未四八豈遂貪華纓

安肅縣寺病居漢陽董玄亮見過時董奉使還闕  
門前易水路下馬漢陽人野寺天晴雪他鄉日暮春相  
逢一尊酒久別滿衣塵不憚王程急應憐伏枕身

謝病後初朝

舊識趨朝路重來謁帝庭出門聽曉漏立馬望春星拙  
病身仍在羈栖志少寧盛時誰不戀終日憶山坳

簡友人始至京師

始自辭京邑終將守敝廬猶來殉寸祿令我情何如千  
里門前路三年袖裏書懷君不相遇日但恨頑疎

寓居慈仁寺遊覽

終日仙宮掩青松繞殿遮到來長春草行坐落天花閣  
上王城盡門前官路斜微身隨處是何敢歎無家

與王庸之飲

旅舍背都門春風酒一尊坐看芳草路回憶故山村為  
客難稱意逢人未敢言留君須醉倒無奈日黃昏

歸自蕭氏園作

到來日已暮歸去戀柴門空自山當舍其如酒滿尊心  
知柳葉長愁見桃花繁立馬一回首令人思故園

毘盧閣上同伍疇中諸公西望

客來常一上對此西山平向夕簷楹立憑空閣道行楊  
花飛暮野雨色動春城却戀同攜手都忘羈旅情

寒食日毘盧閣上寄茂欽

高樓晴出帝城南楊柳千家夜雨含欲換春衣驚客久

况逢寒食思誰堪門前歸路愁心繞檻外羣峯僻性耽  
憑報故人應相笑微身何事戀朝簪

送車氏之齊河二首

車長  
葛人

昔予與夫子讀書汴水南今纔綰縣印我乃厭朝簪落  
魄時難識離魂日不堪都門春復晚須對酒頻酣  
聞道齊河縣應將長葛同近關愁驛使小國想民風作  
吏情如此為儒數好窮聖朝莫不用徒自失豪雄

飲任文選宅

敢謂齊年齒常嗟夙抱心文章知汝在交契為誰深華  
屋春燈豔層城夜析沉賴蒙終夕語客路一開衿

與鄒生遊香山宿僧房

遽愁春草歇驅馬春山中夜宿禪關下時將心賞同風  
生近谷滿月照前湖空終愧淵明輩玄言對遠公

華嚴洞上夜作同鄒生

宴坐最高頭馮巖散客愁俯聆玉泉響仰眺金波流伐  
鼓山堂夕焚香石殿幽與君學栖遯它日更相求

送仲實黃門扶侍還固始

一路通淮水從親千里餘到門繫舟揖登岸啓園廬  
洲富千頭橘溪深盈尺魚明光待起草且莫賦閒居

晚出都門登寺閣

柳葉桃花雨夜乾今年寒食在長安淹留不為依雙樹  
蹭蹬合應笑一官行出都門常日暮到來客舍已春闌  
芳菲滿眼心無奈祇上毘盧閣上看

送別家兄張掖門時謫開州



垂泣一相送臨途無限情功名何物是流落此心驚  
夢裏窺鄉樹愁邊滯帝城終朝誰復語猶去戀塵纓

簡子陽廷評

終日祇緣此微官奈若何世情堪歎息身計任蹉跎  
客鬢涼風早鄉心夜雨多故交誰復在無厭數來過

雨中簡子仁員外

積雨曠朝暮層城苦沉沉端居誰與言抱此懷人心  
一為軒冕拘遂使名迹侵長愧玄豹姿隱霧南山岑  
君通

微妙理佇想開塵衿

送閻公甫赴保定太守

郡城三百里北望即皇都  
驛路客常滿征繇民未蘇  
門臨白溝水山繞太行途  
君到為良吏平生仰壯圖

送別伍庫部謫居

開秋庭樹落旅館日已涼  
高空氣蕭條萬里鴻鵠翔  
子有江南行離別結中腸  
貧病憂方集無能具一觴  
平生寡交遊逮此盡分張  
讒言亂白黑賢聖昔徬徨  
顧我賤

且愚如君則何傷榮名不足為憂患莫可量聖朝非棄  
才大君如虞唐茲邦佳山水遨遊保樂康窮達難預謀  
願君履其常

被言後作

高材多負憂潔身易招累余生本頑疎何取當年忌守  
官郎署間恒若臨高墜分過每自驚名微久知愧中歲  
反故丘三載甘斥棄秉操苟不堅出處成二致復此還  
京邑長路果顛躓赫赫明聖朝賢俊駢足次懸爵待天

庭但非通時器人言敢誰尤默默傷風志

簡袁永之獄中

本同江海人俱為軒冕誤子抱無妄憂余有多言懼昔  
來始青陽今此已白露豈乏速進階苟得非余慕罪至  
欲何言直以愚慵故衆女競中閨獨退反成怒追誦古  
時人蒙冤誰能愬皇心肯照微與子齊歸路

送別永之

憐君方遷戍況我嬰愁疾一別若流雲相從竟何日平

生託交遊弱冠弄篇帙書願藏名山功期銘石室安知  
事不就跌宕情如一已矣復誰陳令亦反蓬華

送別德兆武選放歸

燕郊秋已甚木葉亂紛紛失路還為客他鄉獨送君罷  
歸時共惜棄置古常聞莫作空山卧令人望白雲

送皇甫博士重補曲周

辭邑初耽寂攻詩每晏居貧家滿坐客閉戶一床書襍  
被情何忝腰章意已疎問君趨府處高興復何如

贈送蔡蘇州考最還郡

漢家存舊令侯國有斯人

漢法侯國人  
不許備宿衛

統絃諸生貴金

貂帝族親登朝賈誼少拜郡  
孟舒頻半刺官猶薄全吳  
化已馴誥頒鸞紙閱板露鸛書真上最登王典中和頌  
使臣才憐同舍屈情以異鄉伸臨路何如贈期君樹德  
新

送張比部允清歸養

鼎食思歸養拂衣懽遂初  
深辭西署寵獨守北山居伏

臘趨庭屢鄉閭進壽餘架樓藏紫誥閉戶讀丹書吳橋  
秋成橘江門日薦魚親顏老更悅取樂欲何如

中秋同栗夢吉飲

罷酒俱不樂開簾望北軒寒星出戶少秋露墜衣繁散  
步憐新詠平居想故園空庭今夜月客思豈堪言

送管平田先生頒封秦府歸省

五等周分國三王漢世家日聞敦帝族時見遣皇華翦  
土仍鶉首疏邦自犬牙秦關通使節灞水渡征車過邑

恩難屢登堂禮更嘉何如北山客行役動長嗟

送太宗伯介溪公南都十二韻

露板承權渥天書拜寵靈春官典邦禮風后佐王庭出  
入登三事遭逢起一經持衡人莫眩講殿帝親聽妙思  
黃華句雄篇繡補銘龍文生赤汗鸞翮奮青冥暫枉神  
都遠同追祖帳停二京分化理八座備儀形仙擢花催  
發官途柳為青微生荷翦拂孤跡困飄零空謝伸眉日  
多愁短髮星公還衆所祝強飯念朝廷



歲暮答許武部廷議懷歸

掩閣日愁晚他鄉歲已深未能逃世網豈是戀朝簪以  
我不如意憐君同此心故園春事及歸路儻相尋

再移居

僦居屢傍禁垣西曲巷重渠路轉迷萬事無能心盡懶  
一官何補首常低歸衝落日時驅馬起伺朝天每聽雞  
濡迹自傷非宦業綸竿終有故山溪

送仰之侍御謫興國

別離無奈客心煩  
直道南遷荷主恩  
臨路加飧好自愛  
平居握手更何言  
連山楚雨迷官舍  
隔縣鄉音認故園  
君到江州定回首  
同遊霄漢幾人存

送許國華之靖州太守

零落同聲和者誰  
憐余今恨得交遲  
榜中初已收名士  
卷裏常因見好詩  
漢邸拜官懷綬日  
楚邦行縣卷帷時  
政成它日看循吏  
黔郡生祠第一碑

至日省中

慣逐官僚後欣逢郊禮嘉蒙恩賜冬假拜手慶年華暫  
亦休朝馬閒唯待暮鴉人言郎署好畢竟未如家

齋居偶題

自免知何病重來尚此身愁多長畏客官拙竟隨人日  
鎖空庭印風添滿几塵山田薄亦好不去豈關貧

壬辰生子

客賀當長至渠生履歲和更衣起自慶醉酒坐同歌身  
世浮沉甚田園蕪穢多吾今只若此知爾復如何

春夕同李考功道舊

下馬春庭夕明燈夜雨深人多新歲感日有故園心磨  
滅名題柱淒涼賦賣金十年同省舊誰念各如今

送陳永和鈞改官之真定學曩府君教處

厭事嘗疑拋縣印之官又見向儒宮城臨沱水新橋在  
路繞恒山舊驛通乍到士人應認姓試詢父客幾成翁  
經中更廢蓼莪講坐處青氈恨頗同

再去都別親知

少缺經世用遭遇明時康出入在省閭仰逐羣賢翔譬  
如駑馬足側畏道路長顛躓不終朝中歲還故鄉願言  
守舊廬沒齒乃其常皇恩究微物明照收羣方改服起  
漁樵端笏陪鷄行碩疎果難容進退益多妨猶叅大藩  
居守此國西疆華階豈不崇榮進非所望退念孤蹇跡  
臨路私自傷無為世俗牽久要不可忘

秋日贈別諸進士

陪役忝南宮文場收數公名加周鼎重價敵楚金同遽

向公車別先愁客位空一尊良已薄慰此路西東  
別館敞秋晴離筵蕩客情致身付公等分手使人驚陽  
鳥迎霜動陰蟲候夕鳴贈言何以歎虛薄愧吾生

欽定四庫全書

蘇門集卷二

明 高叔嗣 撰

讀書園稿

自序曰老子有言知我者希則我貴夫人不期  
於世之知而何較貴賤耶余素弗攻於辭戊子  
以吏部郎中謝病歸於家開封當郡縣孔道應  
接稱煩余於是徙之城東田中依舊廬稍葺治

以居家貧遂力農事月裁三四至城而已當是時李空同先生方盛邑子之屬出其門撰為文辭摸於古人若宋蘇軾唐韓愈薄不為也余私心不能無慨慕時時竊撰一二篇庚寅歲所著獨多踰年余既上京師斯事乃罷夫本非所長而強力慕之度必取誦於衆然其篇留筭中甲午余分守冀南將按縣晚出文水方初冬新雨已車行村墟景色如故園余恍然太息其夕宿



汾州燒燭披取笥中詩事歷歷在目低回久之  
夜不能寐非特憾於詩也曩者不能取容故退  
而耕於野丘園之樂使人忘老而余不自持復  
且苟焉干祿渙忍於今犯詩人胡顏之詬其知  
於人也蓋希矣然則余豈貴邪老子之言明其  
玩世也已汾州多文士暇因出是篇正之高叔  
嗣題于清心省事齋

始至讀書園

疲繭違時好歸來踐夙懼田園深自託朋舊肯相寬挂  
壁尋耕耒刈林選釣竿亦知身寂寞長冀賞心觀

元日同谷子延賦

雄都盛賓客車馬爭馳驚芳辰啓初年宴飲多所務不  
知灌園身何為迷方誤郊館抗空壑山扉啓峻路良朋  
平生歡就我今朝步城因並舍登徑為穿林度微陰原  
上明片日雲中露青霞照深池白雪停幽樹共貪歲欲  
新不厭日旋莫農田方在茲君豈數能顧

子修侍御見過時謝病

郊扉臨巨壑野日照晴空柳色春衣上波光曉鏡中當  
軒留馮馬出戶倚雙童欲問朝簪懶人今卧病同

再同子延上方寺賦

已忝陽春遊再陪瓊瑤作首歲與君同名區踐初約芳  
風散入林陰靄通相薄微雨點春城流雲蕩仙閣樓當  
望遠立酒共馮高酌樹裏梁王臺水際夷門郭伊余本  
孤蹤事主乏明畧偶因負郭田解印歸丘壑閒居道心

增日戀空門樂安得拙病軀放達長此託

敘懷二首

生長夷門郭往來莘野路家貧無良謀躬耕有遠慕始  
窮伯王畧遂覽生民故曰余本空疎當年恣高步慶彼  
鳴鶴期忝此飛龍顧亦知敝帚材早享千金誤日月不  
我留撫心慚往素

伊昔追弱冠奮足參賢豪衣褐出下國脫輓造中朝聖  
期開九五河清在一朝升龍假玄淵鳴鳳託芳條五從

宰府辟連荷公叔招名過有瑕  
顙道在無矜驕猶全不  
肖軀解冕來逍遙

空同宅海棠樹下賦

花下一壺  
酒為韻

良辰隨繫馬仰面看名花  
二月芳林畔春風柔且嘉  
不惜花陰薄愁窺日景斜

花覆金杯中客坐磐石下  
芳條媚曉堂新雨驚春夜  
共拾落英妍翻空繁華謝

酒半向高堂不知送白日  
隔林見花景皓月東方出  
欲

試暗香發彷彿情非一

暝色起花間向夕景更殊游絲挂花片燒燭坐庭隅懽  
至不知醉唯憂竭玉壺

手栽海棠花庭前歲已久客來能賦詩花開常飲酒主  
人龍門才今日成白首

酬蔚士量見過

勿以歸來早其如疾病何朝朝故園裏寂寂古城阿自  
入深林牧閒當大道歌知非蔣生徑求仲爾來過

呈劉西陂先生將按部洛陽道出小園

喧言洛陽去早蓋首行春尚枉柴門步應憐伏枕身柳  
條簇官騎雪色沒征輪公問袁安事平生解避人

酬李考功茂欽寄憶之韻

別離方此歲談笑欲何時外物都相累中心只自持身  
迷五柳傳手把四愁詩零落親交盡如君能不思

移樹道上

春園就蕪穢雜樹生蒙密不知雨露功長養何多術婆

娑使人憐斬伐終余恤乘時聊徙植于以託吾室交生  
兩相當列映直如一轉令門巷新遂放雞豚出修修原  
上風團團村邊日紛吾本蹇劣兼爾抱憂疾敢學成都  
桑而謀荊州橘願及垂陰成初志儻此畢

寄亳州薛考功

少年不識字持戟仕金門萬事蹉跎豈自料一官憔悴  
與誰言上書昨日辭天子還從闕下歸田里束縛始自  
重為人激昂尚欲酬知己不悟名輕世果然翻嫌計晚



身如此便爾深林學遜栖家貧那免杖畊犁腰鎌暮向  
夷門北倚杖朝過莘野西伐木手營一茅宇披榛力灌  
幾藥畦篋中筆硯無時把肘後詩書坐懶題往往頑癡  
衆所疑悠悠端合困明時聞君解註五千字

考功頃宅  
注老子

畔仙窟定所知此日低頭應笑我平時開口却為誰

### 晚步

出門還自笑復此欲誰親惆悵村頭樹歸來路口人風  
聲兼亂葉日氣抱遊塵豈不躬畊苦東看是有莘

觀游人

大道通遊遨傾邑出車馬玉管移高堂金鞭臨曠野盡  
踏芳草中時歌花樹下浩蕩春思盈留連莫愁寫回看  
巖石間顚顚躬畊者

寄憶茂欽員外

閒居已可懽况復乘嘉月山鴈日自鳴園樹皆爭發出  
從草際歸行傍村頭歇臨流或漱齒倚杖乃散髮此時  
正憶汝振珮趨丹闕

霍開府載酒見過

列坐青郊映容門  
畫戟雄晴原獵騎  
外春草舞筵中玉  
珮邀皆至金尊狎  
與同無將灌園意  
錯訝楚三公

少年行

死士結劍客  
生年藏博徒  
里中夷門監  
墻外酒家胡  
有時事府主  
無何擊匈奴  
虎頸一侯印  
猿臂兩雕弧  
誓使名王侍  
羞聞邊吏誅  
長驅隨汗馬  
轉鬪出飛狐  
蒲壘遂破滅  
莎車不支吾  
甲第起北關  
蠻邸開東都  
豈學嫖姚

將椒房仗子夫

春日行

大隄花欲然芳郊草不歇  
冶服誰家子良辰爭馳突  
寶劍本侯家金鞭自俠窟  
共矜百金裝相誇千里骨  
雲散懼未終月明還城闕  
朱門徒御稀青樓歌管發  
倡女盡朱唇貴主俱鬢髮  
衣向車中更爚從坐上沒  
誰論牆東生白首羞干謁

春日省臺諸公設飲不赴作

不能營世務拙病屬相尋偶隨飯牛侶遂此逃人心東  
郭春復晚三歲忽于今臺臣猥垂念張燕情何深公門  
隔崇重華館肅沉沉賓客盡來集冠蓋中如林恨以微  
病在芳尊不共斟抽筆對來使日夕起長吟

與客遊宗戴樓城門九老泉上

草廬相携處田家水郭間林風動衣帶泉色照容顏軟  
草留堪坐芳花折與還春城一散罷車馬更難攀

答谷司僕見問

幸自返中園  
非關逃微祿  
方因疾病餘  
黽勉供樵牧  
春至東郭田  
夏來北林木  
時從遠原上  
日縱平郊目  
野老逢與言  
道書閒能讀  
何為共世人  
無事相追逐  
勞君問出處  
日莫掩茅屋

與霍將軍集和大齡莊

暫息城隅駕  
欣隨驃騎筵  
園林窺勝地  
談笑接高賢  
花外仍張樂  
林中正擊鮮  
晚來車馬散  
歸就故村眠

紫團山人歌贈上黨栗夢吉陳州之弟

紫園高山槩青雲生賢吐瑞合氤氲二馮卓犖

奉世野王不

可睹栗家兄弟殊不羣陳州一出驅五馬令弟二十窺  
三墳博物自識顯陵策對人能讀嶧山文今日漢家方  
貴少歸來結綬朝明君

賦得嶧山碑送李東升明府

秦皇千載後嶧領尚遺碑斷石青山路孤城滄海湄蕭  
條餘霸氣磨滅想雄辭君到鳴琴暇應多弔古思

與客集和氏園

惟君遊每接自余居多暇留連上客筵款曲中園駕賦  
詩芳泉側舉爵茂陰下放心安知憂携手不能罷日氣  
淡將夕雲影垂方夏為農信可歡世自薄躬稼

曉還城休左氏莊

與君枕隄日共結東城廬日出蒼林背回看十里餘柴  
門通大道村巷隔平墟主人心無事見客頭未梳累言  
惟農務一飯但園蔬方當數來往肯為容籃與

夏日林枋田家六言



手疏偶然辭主腰鎌率爾為農今日田園自許平時車馬相從

雨後千家競似雲中萬木齊高路口來過杖策牆頭方挂釋臯

芳樹不知冬夏荒城何計春秋有客今辰攜手無人終日科頭

輕屐會臨池上方牀好坐林間酌酒壺乾未已賦詩坐久忘還

斜日深林度鳥微風亂柳鳴蟬茅屋人歸水際柴門路  
繞天邊

欲笑於陵逃井還輕顏闔移家顧我何營世務對君但  
惜年華

晚過陳蓋卿時寓居廢寺

不識禪宮廢來從客舍看如何種竹趣相對雨花壇新  
霽開晴景微風起夏寒淹留未忍去華月在雲端

從陸道函問命

壯年方自顧多病會相乘山澤思長往榮名懼莫勝浮  
雲寄宇宙野鹿返丘陵舒卷隨其適優游焉所懲從君  
問季主倚伏欲何馮

得張子家書

晚日照餘晴荒亭暗復明歸雲度深樹飛雨過高城蹇  
劣慚當代栖遲笑此生空持一書札長歎故人情

東原晚望答李鴻漸

東原晚望草烟齊久卧無心出路迷閒立秋風看未落

獨行斜日聽烏啼一官已謝於陵後百畝纔開莘野西  
此地故人應念我逢人昨有數行題

初秋谷司僕杏山別業

田廬元自接談笑竟相從是日當農暇秋風動客客開  
尊臨積水解帶挂長松欲去城東陌留連聽暮鐘

贈別永和陳明府秉中余與秉中同舉於鄉今十  
年矣秉中始以親老乞教馳驅江海所懷未盡遷  
官西去遇於故園之間倉卒離顏情意吐申鬱鬱

無已詩凡二百一十字

十年宦未達萬里猶一官適從何方來又陟晉山巒拊  
髀忽自笑把臂聊相懽伊昔被短褐同步入長安遭時  
賜顏色當年厲羽翰君獨念老親吳門彈儒冠高堂甘  
旨薦學舍苜蓿盤遲回竟蹭蹬感激生愁酸衆中見年  
鬢坐上論溫寒明鐙對深夕還作故鄉看嗟我病狗馬  
昨亦謝鵷鸞無才媿明主仰荷恩波寬種豆白石岡垂  
竹清水灣

白石清水  
皆今時名

丈夫貴適志出處預難觀寸心向

誰是逸氣徒莫干君其安小邑鳴琴到可彈石樓與永

和自古稱彫殘不見太公望神靈泣灌壇

世云石樓永和多挾左道

引故秋風動當夜白露簷前溥一別更何所不覺起長歎

逢李淮安

悵別各千里忽逢指寸心明鑑不自意故國乃相尋寒  
館鳴秋雨高城結暮陰胡為疇昔願江海尚如今

揚州門主人

空林一葉落茅屋幾家秋對酒涼風至開簾古木幽相

看還自笑欲去為誰留正北夷門下休猜姓是侯

雨後有懷子延

驟雨新秋晚微晴墟落間悠然抱藜杖率爾倚柴關空  
豁纔容水流雲故滿山遙知城市裏應羨此身閒

秋日感懷卽事

盛時畏易衰修名患難立伊余心不逮年命降將集素  
髮今已乖晝省昔嘗入感往慕寵靈憂來戀鄉邑咎本  
懷壁招時豈贏糧及坐見白露漙行方朱火戢小人安

金史紀事本末  
卷二  
故丘始願終能執

和汝南見過

晚日留仙轡涼風勸客尊  
偶然擊筑伴依舊抱關門  
樹落千重葉蓬吹萬里根  
病身一如此誰念在孤村

東壁偶題

卓帽遠東客青門漢代瓜  
寧知汴水上更有野人家  
巾服臨秋換壺觴自遠賒  
閒身與逸興並向物情誇

九日登城樓宋故都門



佳節倚秋城朋曹晚相逐竊憐坎廩心暫寓登臨目日  
落故鄉杯霜寒遊子服百里覽山河千年看陵谷生欣  
盛時康追歎亡王促帝功頽九五霸氣消百六猶能識  
宮觀但見登樵牧縱酒在高樓悲歌對喬木身同司馬  
病懷異步兵哭舉頭望長天萬里來鴻鵠默尋階除降  
獨去歸茅屋

友人設飲病不赴

荒村猶病卧空媿故交深復有高堂宴無如伏枕心寒

郊懸日影平楚帶秋陰向夕東城望寧知佇立吟

送別蕭司勳

柴門夜語罷惆悵出前林曉日孤村映秋風落木深別  
來生白髮歸去換思心還復茅簷下朝朝鳥雀吟

逢友人

幾年別京縣昨日詠歸來本無奔蹏用且養擁腫材窮  
巷在東郭柴門臨路開經時到城市累月迷蒿萊傳君  
渡漢口八月朝天回鞍馬落秋風賓客滿高臺相尋重

款聚相慕屢遊陪客舍不洒掃衣冠多塵埃懽然握手  
笑對面無嫌猜方思在霄漢賓友如雲雷春天浮屠館  
夜雨皇州杯鷓鴣各善賦鸚鵡皆天才看君振藻翰江  
鮑力能裁聲華俱美矣懷抱何悠哉而我獨病困于今  
翻自詒長鳴戀儔匹蹇步安駑駘賞心夙豈在離限茲  
仍催故園乘秋景黃葉紛如摧長天隨道路落日徧城  
隈贈言無終極蓄意獨徘徊

偶題

久為南畝客況此北窓時  
翻笑陶元亮應多歸去辭  
涼風昨夜起殘雨夕陽移  
坐卧身無事茫然生遠思

秋夕

問年有短髮逐世無長策  
日已遠人徒秋方卧阡陌  
天高星流火夜久月生鬼  
萬形觀此化四運愁相迫  
身非塞北翁情是周南客  
聊齊得喪心安此留滯迹

感事

涼風摧高木夜雨生秋草  
蟋蟀吟東壁霜露凝西顙  
志

士感夙心嗟此頽光早靜言執玄德長揖解洪寶亮之  
嘉遯節尚慕丘園道古人逝不存何用抒懷抱

曉起

惆悵空堂曉蕭條秋氣陰懸窓對疎雨落葉滿重林長  
往懷仙事端居養道心誰知歲復晚高志莫能尋

王元玉偕鄧應和見過時元玉將北上

霜落歲方晏田園空復情念君重離別邀客到茅荆晚  
日農夫語秋天鴻鵠鳴坐中間疇昔無事解朝纓

曉出前林

理櫛聽鳴禽，寒帷望朝旭。快然登前林，烟芳紛滿矚。秋晴帶餘陰，夜雨生新綠。道勝絕紛華，情愜關幽獨。在天羨白雲，凌風慕黃鵠。賞心久已違，感此勞中曲。

簡李伯材

抱病敢稱隱，端居祇自驚。林臯白露下，庭際綠陰生。偃蹇時方笑，蹉跎歲屢征。惟君重幽賞，共此郊園情。

夏夜同袁德延騎出宿村家

景落息炎氛，輕策稍相試。  
微風送林木，皓月臨平地。  
路遠忘前期，情愜隨所至。  
田父止我宿，茅屋勸客醉。  
起步中天空，仰對明星次。  
一貪雞黍筵，三歎前賢意。  
軒冕愁束縛，江海傷憔悴。  
且願為老農，敢謂辭高位。  
明發返故墟，努力看身事。

酬左舜齊林中冬夕見寄之作二首

霜葉落漸空，暝鳥飛俱罷。  
出門歲已闌，倚樹人方暇。  
映月眺煙郊，了自見茅舍。  
下有飯牛朋，商歌滿初夜。

携手自京都歸心乃疇昔豈不戀明恩久持金門戟今  
日故園身殘歲空堂夕含情亦何言塵耒挂東壁

晚出曹門北道

晚日郊關迴寒冬筋骨勞不知臨曠野何事走平臯斜  
路孤村引空園亂木高歲闌令去卧誰認在蓬蒿

冬日西園

泱泱空寒野蕭條只舊林登高時送目望遠日愁心世  
與身為累貧將病轉深無能學袁盎閭里共浮沉



西園再酬谷子延

茅屋還相見冬郊那可聞  
荒城連凍浦落照與寒雲  
遠樹行時倚歸途到處分  
留君終日語猶自日思君

谷司僕田黃門諸公見過

山林高士駕鷄黍野人心  
不避家貧饌難忘歲暮尋  
寒城雲際擁晴樹雪中深  
誰念平生意幽栖獨至今

與諸公登舍右古城

積雪嚴寒當此地尋幽尚有故  
交能穿林斜路逢人過

旁舍高城共客登，玉樹望中梁苑盡。  
金湯行處宋都曾，留君貰酒柴門晚。  
何獨山陰興可乘。

次韻田水南見過之作

夜雪連窮巷，朝來片日暉。  
故人停駟馬，問我掩雙扉。  
自出知誰是，相看能爾稀。  
家僮釀酒熟，獵伴射禽歸。  
草具成賓饌，木綿對客衣。  
歲寒心不淺，日暮意難違。  
客興催花發，農功候鳥飛。  
期君前浦泮，預指釣魚磯。

劉西陂函山二先生見過

簡畧缺世用守此郊扉居天寒草樹盡卧病情何如臺  
臣存舊好宴飲及吾廬伊昔趨天階俱銜君子惠提携  
文苑游出入鵷行綴良時未可忘世故身相繫安知尊  
酒同歲暮荒城際無輕一日歡乖離幾更歲

招友人

散髮終朝偃舊林墟中無事肯相尋數家砧杵驚秋早  
滿院蒿萊對夕陰多病祇堪謀藥物微官何敢污朝簪  
濁醪漸熟來同醉無限蕭條歲暮心

宴王禮部紹甫諸君

寒日轉高館微晴冬朔餘窮巷多冰霜車馬盈我廬良  
朋四方來各擅當年譽言論吐中堂溫如春華舒枚鄒  
久不存梁苑為丘墟千載得斯人燕好同其初嘉會不  
可常古人言豈虛有酒今不懽歲晏情何如


將去故園時有令請告三年削籍

出身本疎慢秉志惟山潛請告及三歲拘迫時禁嚴欲  
出乏明畧退處還自嫌朱紱繫我腰仰戀明恩霑不能

遂舍此安敢尚久淹且當整駕去三歎顧閭閻

將赴京述懷

請告有嚴程命降不遑安行子起自視當此歲已闌出  
門冒雨雪所畏非天寒上戀高堂養下顧同生懼將乖  
意方切欲去情彌難豈乏躬畊餘可以供晨餐終媿達  
人心不能棄朝冠平生亦有志臨路但長歎三年保閭  
井國恩良已寬



蘇門集卷二

欽定四庫全書

集部

蘇門集卷三

詳校官給事中臣王鍾健

中書<sub>臣</sub>劉源溥覆勘

總校官進士<sub>臣</sub>楊懋珩

校對官原任典簿<sub>臣</sub>郭祚熾

謄錄監生<sub>臣</sub>查浩

欽定四庫全書

蘇門集卷三

明 高叔嗣 撰

晉陽稿

自敘曰嘉靖癸巳余始出為山西叅政春去都  
繇漕河汴汴歸上蘇門山以其秋杪乃履官屬  
歲饑奉役往來遠沁汾潞之間無寧日踰年冬  
朝京師其明年歸復自汴入晉軌轍所臨殆徧



馬亡不再至者復踰年乃轉為湖廣按察使可  
謂久矣余本農夫每造山田林壑蓄志所感慨  
然太息歸心萌作發為篇詠又多戎馬邊陲之  
警其詩率著于驛壁吏從旁書之都為一卷畧  
無去取觀之可以考歲月動定所繇自余之出  
友朋亡省記余在山西者縱記之豈復知其勞  
且久者虜雖余亦且忘其久何則居閒亡事優  
游暇豫則視日舒長今卒卒薄書朝也疲于應

事夕則偃卧于室擾擾不知夢所之少暇不過  
玩日自解如此而豈復知時久速耶夫吾且忘  
我而又誰之求取觀所作篇恍不自憶雖然苟  
書是以視同遊庶嘗有省記余者詩凡九十首  
是歲丁酉仲夏望日

河西主人壁

不識河西遠留連夏日長主人設高會上客滿中堂近  
海波流異夾河池館涼回瞻京邑路雲樹極蒼茫

武城漕河逢張使君考功舊寮

岸折留餘照舟行稱晚風歸心千里倦行役一時同置  
酒蒼波上停撓綠樹中思君如河水何日不朝東

歸途大名晚行

客心異早安川途爭晚涉水宿阻風湍宵行問舟楫時  
見遠村明月出荒城堞良時余幸遭青瑣官常攝已多  
絳灌毀而無金張業來往路將疲出入心獨怯夜夢守  
舊閭勞懷先已愜

初登太行山

高岳千重發馬鞍故園回望客心酸  
他年筋力知衰健已厭羊腸九折難

至蘇門山二首

高尚心徒在良遊今始能  
名山無俗侶日暮亟攀登  
空山暑氣少臨水夏雲多  
照影人將老愁心在夕波

權店晚行

孤城吹角罷黃昏歸馬蕭蕭向驛門  
衰柳更添霜後色

殘流初耗雨餘痕求田未果青山願出守仍銜紫禁恩  
轉入亂峰行不進投身空館寂無言

十一月朔孝義道

山城風物歲將闌行縣初因問俗安授厯漫驚違一載  
趨朝尚記逐千官烟鐘動闕天微曙火樹薰庭夜不寒  
久忝恩私今始悟簿書催急驛程難

太原縣西十里亭逢張景周憲使歸田

京國當年進謁曾柏臺棘寺舊儀形未言投劾歸田早

長羨出疆矯制能晉地彫殘非往日漢家兵火劇繁星  
逢君便作東西別他日相思記此亭

文水縣驛壁讀王司僕德徵詩因和其韻一首

長塗無驥足短髮有漁舟感歎如同日羈牽自去秋寒  
燈知客意鳴折亂人愁屏上山川記何因認汴州

清源縣作

行縣時方暮山城歲弗登寒燈斜暗壁夜雪灑空庭案  
上閒周禮囊中貯呂刑吏情那可道歸去幾時能

交城縣壁

汲黯匡君意，顏延出守情。  
憑高無處語，寒日下孤城。

汾州憶家兄時自虞衡郎中左遷同知嘉興

憶昨蒙恩與子初，雙垂印綬奉宸居。  
賦詩春日趨朝後，把燭良宵下直餘。  
今日客身何潦草，古來人事有盈虛。  
江湖萬里天南北，歲晏山鄉少報書。

十二月十四日有憶子陽仲材諸人一首

去年今日共長安，遣騎邀賓卜夜歡。  
別後客身愁裏老。

向來人事夢中看  
殘更改席歸猶懶  
大雪盈庭醉不寒  
念此邊城獨坐語  
相思晴月滿林端

至日晉府拜朝同曹仲禮

王庭肅穆映朝暉  
圭景纔長暖力微  
此日預沾新歲酒  
同時應認舊朝衣  
暫開宮殿倍仙仗  
端望雲霄拜帝闈  
不到邊城時作吏  
向來恩遇未知稀

靈石山行

長路天俱遠  
高山日易昏  
強餘疲馬意  
垂首戀君恩



襄陵縣庭

邊地人愁老寒齋酒醉醒鄉心何處見院竹一叢青

夜次冷泉關用呂太史韻

山寺憑鞍歇冷泉高峯月出滿林烟非關定性人忘睡  
自是驚兔夜不眠

遼州上元立春城西寺同孟東漳作

山城鐙火巧逢春野寺芳筵接故人石路晴餘雪色好  
花宮滿映月輪新一杯最喜同今夕再拜俄驚見此身

之死賊與妻妾之報公可以知公之為人矣天不殄其  
後豈不宜哉銘曰

雲雷遶屯宇區分篤生真人鎮乾坤騎龍鞭霆下天門  
前翼後衛涵若雲誰其最雄花將軍力驅智駕敵萬人  
蹂躪羣盜猶麀麀大刀長戟屬囊鞬左麾右刺流電奔  
緋衣緇弁貔虎屯駐馬飲江江水渾吳越之域殺氣昏  
手挽天河洗妖氛軍聲隆然若雷震遭者膽落兩足蹲  
元戎開府大江濱腰佩兵符威令尊控制上游為國藩

偽漢恃力不圖存建旗揚帆事征鼙艨艟蔽江躡鉤援  
植牛享士士氣伸馳馬督戰寧顧身賊焰熾若烈火焚  
大戰三日勢愈殷單騎赴之齒齧齧怒髮上衝氣如烟

叶

汝賊兇頑犬與豚願醢汝肉一口吞賊慙耳塞不忍

聞至死不屈酬國恩飄然乘雲叩帝閭請為厲鬼扼賊  
元賊當殛死洗厥冤天子下詔褒忠勲東丘建侯賁九  
原孤兒保育寵便蕃不墜宗祀天所救生為烈士死明  
神神靈在天光煇煇嗟爾來觀萬子孫繼忠思孝慎勿

諛弗信請考太史文

故翰林侍講學士中順大夫知制誥同修國史危  
公新墓碑銘

嗚呼翰林侍講學士中順大夫知制誥同修國史危公  
享年七十以洪武五年春正月二十三日卒于和州含  
山縣之寓舍其年二月十五日權厝於含山某年月日  
始還葬金溪白馬鄉高橋之原其子於於寔深懼公之  
功行世系不昭白于天下晝夜兢惕自為狀二萬言來

謁新墓之銘濂守官無暇久未克論謨春正月蒙恩致政東歸私念公相知特深在前朝時欲引薦入史館及今待罪禁林實與公為同僚相得甚驩於是評薦羣行而勒文于碑其文曰公諱素字大傑姓危氏危本姬姓周武王庶子某生而手中有文曰山因賜姓危氏封於新其後居光州晉永嘉中建州刺史京遷建昌之南城唐黃巢之亂全諷與其弟仔倡赤手起兵擒巢黨柳彥章于象牙潭擢撫州刺史累官金紫光祿大夫檢校大

病關愁得鄉心逐夢回投書報明主早晚歸蒿萊

奉次艾峯侍御送李叅政平寇後擢任南陽之韻  
中臺決策靜妖氛  
幙府得賢獨冠羣  
正有捷書傳白日  
況兼寵命下青雲  
鳴笳喜動三關士  
授鉞功先四道軍  
見說南行蒙上賞  
汾陽人勒去思文

汾陽道暮晴下四首俱奉和姜侍御之作

連城催暮角  
暑雨變新晴  
垂穗綠槐合  
將雛烏鳥鳴  
山川發高詠  
州邑寵巡行  
莫怪炎蒸歇  
霜華滿路清

孝義道曉發

新雨曉天霽餘霞抱日長平原多草樹夾路鬱青蒼下  
馬文侯墓看碑卜子堂埋輪一何壯共識無豺狼

施同寺是日奉陪弗及

樓閣丹青上烟虹石壁重雨餘淨香界天際響疎鐘汾  
水當階次綿山即近墉題詩人不見驄色亂雲峯

冷泉寺

露冕長林下酌泉大士家根深別有水色冷不關茶香

象浮深壑毒龍護淺沙煩蒸若為減客思正如麻

奉酬姜侍御見贈之韻

探奇曾禹穴能賦豈天台長自羞知己徒言謝上材憂  
加年近老名在毀重來欲去猶增戀歸心寄草萊

盤陀驛再用沁州壁韻一歲中四出此路

乞歸又晚計奔命尚如今九折無良術三鑽豈夙心客  
程任春草官舍即晴林便作途窮哭闌干淚濕襟

四月望後二日奉壽永和松山殿下八韻



圓月光仍滿輕風夏始溫降神元此旦秉德自先藩玉  
殿朱絃合瑤宮紫氣屯雙童時獻藥三老遂通言汾水  
連天濶綿山挿地尊儒衣得上客服冕盡諸孫齊奉千  
秋曲爭持一日樽淺材何以頌抽筆愧梁園

秋日早起偶題

鏡中一夜恨攬此二毛增寡識時方忤多憂日不勝雲  
霓發宵夢簿領迫晨興脫屣吾將往丹丘尚可仍

提調山西試院贈諸廣文二首

重門照月景華館肅秋陰吹角烟樓暝懸鐙夜堂深聖  
代急求賢不吝千黃金辟命來四方文儒集於今芳筵  
列珍殽盈尊敬子斟大國富俊豪譬木產鄧林所願獲  
異材以慰如渴心朱絃曲未奏清廟樂將沉希君鑒幽  
潛為我揚洪音

惟昔忘疲謬趨役嘗南宮藝林閱衆彥文事叅羣公琳  
琅充天府但媿非國工親交一旦遠悽惻數年中遇子  
攜手歎感我夙心同廣庭曙色啓層閣銀河空出門賓

御散嘹唳聞高鴻離觴在朝夕別路長西東何言秋欲盡追憶無時窮

九月河汾書院雨雪陪諸公宴集

千山風雨集九日雪花深歲序嗟如此賓寮盛至今酒中催夕暝樂進解秋陰醉傍龍山飲誰憐幕府心

贈亢思謙入會試因寄京師同遊

函谷投繻日靈光著賦年

王文考  
十九歲

古人猶汨沒今汝遂

騰騫神寶初開璞龍媒早受鞭通衢千里駛美價十城

連藝苑材如此離堂意杳然行收金馬績高視碧雞篇  
京邑多朋舊同聲若為傳

齋中檢舊集因呈孔文谷學憲

寒城朔吹動庭樹曉霜繁省齋稍無事馳情念舊園發  
篋理塵帙展玩不知煩往事盈篇章幽居多苦言郡中  
盛儒彥暇日遂討論敢為矜文譽要識夙所敦廣堂宴  
晴暉旨酒湛芳尊言笑一相投逍遙窮朝昏心賞不易  
值素交世罕存疎簡本吾性牽拘守茲藩高車數來往

無為厭公門

宴別文谷先生赴祁州

擾擾時相見，悠悠遽離居。  
不可道行役，且焉之歲晏。  
冰霜厲天寒，鼓角悲軍城。  
數杯酒官舍，滿篇詩感激。  
多新調飄零，最苦思才高。  
世總棄名在，衆方推暫識。  
風塵色行，霑雨露私郡齋。  
暇北眺猶接帝京陸。

余吾驛壁

秋日何淒冽，曉雲陰復晴。  
客行多所懷，鬱鬱獨含情。  
登

高倦長坂涉水亂河聲僕夫不遑息投館晨雞鳴惟昔  
負微尚于今遂無成田廬日榛蕪何由反躬耕寄言同  
志者羞作望塵迎

送楊方城中允拜表赴都

新秋雨微霽山川氣蚤寒朝日照長林陰霞冒層巒咫  
尺神京路追餞不可攀大君方垂裳海宇息波瀾八方  
修臣職表賀集長安天門闕日月神宮栖鵷鸞甘露降  
中庭色潤黃金盤跪進萬年壽夷夏靡不驩仙管奏樂

府寶饌出大官君臣高宴會維時良已難盛世思夢龍  
留佐虞廷端而我寄邊隅遲回亦何歎

發平定

以下入覲作

空山懸日影長路起風寒京邑方趨役邊城遂發鞍孤  
心向誰是直道匪今難不是秦關客貂裘亦已殘

井陘道中

曉霜塗屋重寒日出林微改轍辭邊徼登車望帝畿深  
山藏驛道巨壑斷村扉欲問前征侶迷津何處歸

得京邑書次新城作

邊城迢遞強西還歲暮征車入帝關  
風定塵沙迷舊路天開雲霧認前山  
寄心轉切鵷鴻侶投足新從戎馬間  
謾道姓名人憶少瓊書長把慰愁顏

良鄉壁間舊題間有虞衡家兄和句

江海飄蓬歎此身重來拂看壁間塵  
五年題字今不滅兄弟相思淚滿巾

過真定呈周中丞



萬國朝正屬歲繁上遊要害此邦存使臣北下頒銅虎  
質子西來敬玉門自是霜威清道路無須雲騎護郊原  
宋都鎖鑰真堪寄漢代扶風未足言

春日同上黨栗道甫登毘盧閣

祇言遠出守何意暫歸朝僧舍春陰重神京暮色遙向  
來成夢幻所歷盡塵勞須共登高閣客憂賴此消

出都

驅馬臨長坂征徒動遠情官橋楊柳映客舍春鳩鳴榮

進額前志激昂謝後生親交好相語此去偃柴荆

寒食定興雪中

二月鶯花少千家雨雪霏可憐值寒食猶未換春衣積水生空霧高城背落暉忍看楊柳色從此去王畿

定州道

夾岸新楊映廣津客行無緒獨愁人故園亦有千頭樹二月中旬返水濱

再次真定城別陳秉中時自京西還

經途雨雪涉冬春倉卒重過柰此身客舍留人酒甕熟  
官橋繫馬柳枝新河山半折北來路烽火全驚西望塵  
別去定知頭白盡邊隅誰念一征輪

星軺驛雨中別林八南還

驛外陰雲合窓中宿雨含深巖龍自鬪險路馬能諳短  
髮星星甚長愁日日堪休將南望淚歸傍二親談

再赴晉陽太行山上作

祇役方如昨銜恩更此年可憐客鬢改應厭馬蹄穿萬

磴深蟠地孤城上捫天東南回眺處愁絕故園邊

避雨五嶺山

鳴雨斷還續連山下復高疎慵元自慣登頓為誰勞問  
館投身促防崖著足牢客程憐若此終念反林臯

再過紫巖寺

受事方從北持車還向西青林含日影赤坂造天倪宦  
味同雞肋官程任馬蹄蒼崖摩遍認隔歲幾行題

雨後拍井同方體易

疎館餘晴片日暉陰移高樹晚涼微自窺水檻人將老  
轉念山扉客未歸天畔綠虹臨戶映風迴白雨過村稀  
荒庭一醉拚君共呼取濁醪興莫違

自柏井還平定山行用西陂座主韻

渴汲香泉玉井瓶午行愁熱待昏星空山寂歷鳴蟬斷  
淒水縱橫足馬經日下孤城邊氣紫地偏六月草根青  
休將淺薄供時議自合深栖與世冥

飲平定孫太守宅奉贈時壽八十二

榆關月出滿晴暉留客芳尊盡夜歸  
本戀青山辭虎竹甘垂白髮守漁磯  
藥欄傍戶花香入藤樹當庭葉露微  
便向磻溪問衰健周王仍欲夢熊非

壽陽東寺閣憶體易

朝來攜手罷夕間賞心同岸幘層樓上  
馮軒野寺中嵐光冒邑里秋氣變林叢  
坐使客愁集非關尊蟻空

太安阻雨有懷都下諸友

蒼蒼雲木變川原黯黯客愁獨掩門  
卧聽遠春白日靜

起看陰壁綠苔繁官名薄劣慚新侶郎署遲迴念舊恩  
強欲題詩報同舍便應投劾去鄉園

還自鳴謙山行用前韻時體易使君亦至

塵鞅苦西東追攀日復同戍樓雨宿夜山館曉行中峭  
壁排雲樹崩湍下石叢流觀亦可悅寵辱此心空

平定城東西交口用壁間韻

敢言觸熱倦悅此午陰長蘭氣清林薄蒲風散野塘高  
陵堪下馬怪石欲成羊可念征途侶題詩偏驛堂

宿八角

巖更金拆起抄歲玉關寒行侶時相問邊程進更難歸  
心惟日夜客鬢已星殘仰悟中林羽投枝亦未安

晚趨忻口

雲峯聊極目立馬獨愁心豈直關山遠其如雨雪深  
聲先入夜邊氣迴生陰疇昔長征意蹉跎力不禁

忻口趨五臺一首

戍鼓行人斷客心日暮悲長風卷沙塞積雪滿山陲  
濡



迹亦何久孤蹤遠更危含情不勝道縱道知從誰

途經五臺山不及攀游

客路迂回甚驅車悵此分懸崖晴度日洞壑晚生雲  
怵迫非吾意悲懽與衆羣終當卧靈岳夙志豈徒云

偏頭關傳節度宅守歲

深堂絃管雜邊聲幕府宵嚴刁斗鳴起舞更衣聊自慰  
懽歌縱酒不勝情關河絕塞催寒盡烽火連山照夜驚  
改歲不辭征戍遠其如客病卧邊城

再出太原赴石州

舊路三年倦新林二月餘行旌晉祠水田鼓漢城墟願  
以烹鮮治無因害馬除往來竟何事媿爾行春車

仲春山行

春事殆過半客行殊未閒流雲開白日微雨點青山身  
世本遲鈍林臯當早還烟郊草色長感此柰愁顏

經向陽硤

屢飯青岑下力疲路轉長投身應虎穴頓足即羊腸天

地固無外關河祇自防驅車舍此去余意戒垂堂

還自石州作

傷舍新泉注歸途柳葉開出無十日計行作千里迴衣帶不遑解車輪亦已摧公私兩何補驅走笑非才

三月二日交城大雪

建辰開此月上已預今朝柳絮寒應未雪花晚故飄輕盈對山榭點綴愛芳條若伴邊愁客經春總不消

鳴謙驛夏夜

閒館草生徧芳林夏氣清月華何泛濫天宇益空明懶  
慢本吾性羈栖非我城投冠還舊里庶此達人情

寄家兄祠部郎中時自嘉興同知量遷

自別五更歲相看千里長聞辭郡府謫欣拜禮闈郎稍  
進雲霄上還追鴈鷺行趨朝日振珮直省夜焚香得罪  
皇仁闊失羣予志傷氣猶負然諾力已困迎將春草邊  
城綠寒雲戰地黃憂心何以見視此髣髴蒼

辛廷評慮囚後喜雨

周人憂旱虐漢使寵循行不睹甘霖注安知讞獄平乘  
飈驅暑鬱入夜潤枯榮河漢分天澤雲雷慰物情一言  
折疑事九死出冤生流惠長無極汾州比頌聲

省中夏日述懷

聊遣塵事營宴坐適心懽重門永日影開簾新雨殘山  
城方覺暑水木湛生寒夕氣冒川澤晴霞映林巒顧懷  
職司憂眷然發長歎華居豈不崇斯人詎獲安先民計  
日食所戒在空餐薄俗匪足矜要使寸衷殫

賦得蟠桃核奉壽朱使君太夫人

昔西母降於集靈東方竊於金馬蟠桃之事世以爲  
妄然陳核傳之先代斯物藏於大內宋承旨景濂賦  
焉故詠云爾

瀛丘初種處漢殿稍當時遺實神應守殊形衆詎知  
穀登玉案注酒比金卮一獻高堂壽千秋樂不支

赴平陽之役次冷泉關

羣盜無由歇官程詎敢寧征衣犯晨露吹角動寒星匡

時悲深志逢世謝壯齡誰言關路永馬足歲嘗經

霍州旅次

久客顏將老逢人舌尚存欲詢干主策所願與誰言  
霍嶽三年路汾橋十室村不堪驅馬去秋日易黃昏

送方體易秋日入都用韻

大壑朝霖滿邊城秋氣高亦知王事急終念客行勞  
騏驎悲長坂鷄鶩悶太牢憑君報京邑曰余返東臯

南關晚行

笳聲入晚不堪聞  
驛路山腰向此分  
洞壑空濛秋雨雪  
巖崖突兀石生雲  
愁心邊馬方頻入  
寓目冥鴻定幾羣  
歸興轉從今日盡  
將因沙塞著微勲

歸次南關驛作

祗役忽于今  
經塗宛如昨  
秣馬息荒林  
振車越重壑  
歲暮滯還期  
客心悵不樂  
曰予本沉冥  
遭時乃淩落  
化海異微禽  
蟠泥宜尺蠖  
方因遷斥餘  
始遂歸來諾  
逝將入雲峯  
滅迹從所託



奉別南山瀋國殿下用韻二首

玉卮申款宴金殿  
覲丰神高視文  
猶古虛懷德益新  
飄零敢自意迂賤  
許相親每憶文園夕  
留歡倒葛巾  
再奉瑤篇至長塗  
慰別情文章魏陳思  
寵譽漢東平日暮  
余吾道天長潞子城  
拜瞻竟無路祇有客愁生

沁州張源鋪

去國三年意還家  
此日心天寒客路永  
日暮衆山深沙塞人  
偏老風霜馬不禁  
如何更萬里投迹楚江陰



蘇門集卷三